

焦太史編輯國朝獻徵錄

焦太史編輯國朝獻徵錄卷之四十三目錄

南京兵部二

尚書

劉采

郭應聘

陰武卿

吳文華

郝杰

侍郎

李郁

虞祥

宋琰

馬顯

陳宜

王詔

黎福

呂獻

王倬

陳琳

潘旦

劉棟

王敦

王積

謝存儒

陸穩

劉畿

顧章志

郎中

劉學朱

主事

曹深

目錄終

焦太史編輯國朝獻徵錄卷之四十三

南京兵部二

尚書

劉端簡公采傳

耿定向

蓋聞古君子之仕也不擇利便不避險難不驚聲名  
不枉徑竇循理奉職行法俟命而已乃輒近顧諟不  
然士人艷慕清華競務巧宦上者矯然樹頰信眉抹  
情飾節欲以釣奇而顯爲名高下者卑卑姘媚附麗  
習爲韋脂簾蘿又其衰也納賄通直如市買然曾不  
爲恥及國家卒有緩急則如竊鼠驚豚縮穴逸垣矣

然如是而卒倖如志者十五敗者亦十五若遵古之道而困厄以老者故衆甚世愆遵道者之困厄而慕彼之成不虞其敗也則率以爲宦術嗟夫嗟夫何不取吾鄉端簡公之履觀之也彼務巧宦而敗者無論卽倖成者所喪滋多守道而困厄故自有不損者在矧守道如端簡則亦卒躋崇廡以榮名終矣獨柰何不法此而慕彼也余爲是慨特述公履詮次其言論俾後進者覽鏡而遐思焉公諱采字汝質別號安峰其先爲洪都人 國初有諱均祥公者始徙麻城居邑東細石嶺是爲河東劉氏曾大父曰德敏以賓貢

登仕佐郎大父曰紀父曰漢舉弘治戊午鄉試爲建  
德令後俱以公貴累贈資政大夫兵部尚書建德公  
長子木舉鄉試仕至濟南府同知次未補邑庠生公  
季也初昆仲咸以文行著時稱河東三鳳云公孝友  
天植居子舍有郎中令浣滌厠牖風家事屬長不私  
財建德公卒于仕公衰毀柴立匍匐護喪歸同兩兄  
居倚廬三年不櫛不飲人服其孝自少惛貌穎中不  
事攻苦而自爛博士業宿學名彥胥傾心下之嘉靖  
壬午遂以春秋舉鄉試第三中己丑會試次春秋第  
二廷對賜進士高第時永康公持國秉權寵甚盛緒

紳多紆意附之以公爲會試所拔高等特贊意公公  
故不肯違衆一調其年臺省多更置徵選新進士除  
補鄉人居銓司者計公才望必在選中預私公以市  
已德公謝之竟不赴選鄉人因銜公擠之外補守宿  
州公雅尚儉素旣蒞宿益自節約卽一蔬不以厲民  
爲治容容而故不受請寄不昵近習其發摘奸伙人  
稱神明焉一日遙望獄中有異狀心動果囚謀逸須  
暮發也鞠之左驗伏辜又民詭愬有人自經死其門  
者不知名氏公視其色有隱遂執按之得其奸抵罪  
屬歲大侵米斗百錢而漕臺督輸急宿民嗷嗷公請

移帑羨金轉糴爲民代輸俟秋償漕臺意異移文格  
之公竟矯申前議民獲蘇至秋民繼編輸償卒無負  
者居宿幾年而遷戶部員外郎尋晉郎中久之乃遷  
四川布政司叅議督理黃冊蜀王遺公金幣膜甚公  
一無所受蜀人有官銓司者與公爲同年居里中以  
私與監司構公寓書規之而蜀人因并銜公旣典銓  
故滯公踰五載不調後蜀人敗始晉廣西按察司副  
使粵西夷部錯居有司煩苛以致負固不逞時部使  
者議勦公抗議撫便部使者憾其抵已上章刺公賴  
當事者故諄粵西利弊乃不直部使者而賢公云某



年晉雲南布政司叅政尋入覲某年晉廣西按察使  
某年晉廣東右布政嘉靖之季政府得以賄交自信  
州始公之入覲也適信州當國諸計吏謁相國率薦  
金幣代羔鴈而公獨否旣信州按儀藉召諸計吏飲  
而獨遺公諸爲公動公故宴如也後分宜嗣秉政溺  
賄特甚銓政濁亂公以是又滯右轄三年不調秩滿  
始轉福建左轄蒞任踰年自度不能徇時取容擬引  
疾去會山東巡撫缺而華亭公新得與政力薦公乃  
得晉右副都御史巡撫山東維時由藩司進巡撫者  
率致數千金爲政府謝沿襲成風雖素號自守者不

免公獨無一縑之餽達空函問起居而已朝士聞者  
或嗟異之而夙與公善者僉爲公危或遺書過公公  
不答曰任之耳尚書趙某者分宜私人也借勢螫毒  
朝士憚如豺虎一歲銜命視師海上鎮巡以下率  
踰境趨迎郊勞賄金累數千計其過東土也公第  
令候吏持空刺迓之趙手其刺恚曰安峰誠安耶諸  
司聞者爲公惴惴或以告公公第發一咳耳公之柑  
循山東也剗去煩文獨持大體遇諸監司暨牧伯長  
吏開誠披懷不爲峻畛以此人人盡傾相與討求民  
隱弊盡利弊爲之平賦均徭與民休息稱頌到今藉

甚其大且難者時民苦採鑛而 命下嚴急諸司廩  
庫不敢違迕公上疏請緩詞極婉剴獲允御史某請  
開膠萊河通海運 上可其奏因遣視公條其不便  
者五御史不能難事竟寢庚戌虜薄郊圻 詔近畿  
撫臣提卒駐臨清諸處扞蔽後歲沿以爲常士卒疲  
苦公疏罷之初巨寇楊士仁聚衆踰青徐間公應機  
勦撫捷奏蒙金幣之賜越三年晉南京兵部右侍郎  
其年以考績北上值虜警報日至而國營協理缺人  
在位者爭引避因廷推及公公受任自矢曰我無橫  
草功蒙恩至此卽有急便當以身殉耳踰年虜患寧

復改佐戶部時大司徒以刀泉不辦獲譴公攝篆

世廟徵發旁午水衡錢告竭公疏請裁諸費不經者  
不報居有頃南京鎮武營卒亂司徒黃公遇害廷

議代者公語家衆曰必我昔人畏國管故使我今人

又畏南戶若阱矣將誰使趣治裝果以公往公之南

也門下士有自負諳輜略者請從以備非常公卻之

曰朝廷使我南將輯寧是寄豈兵之耶若無所用

之比至諗營卒之亂以餉故而餉之不給則轉輸之

弊不釐致然耳維是條畫度支便宜事凡運艦至計

道里遠邇分定便庾以省諸餽費戒主計者別室一

切收支蠹孔由是轉輸者所在稱便而運艦翩翩踵至南餉至今紅腐山積多公畫一規也辛酉以災異自劾免先是公之南也頻行請於執政曰某病且衰不稱任使第以留京未靖誼不避難茲行賴宗社之靈處分得少效其愚慮會須還我骸骨耳至是懇申前請政府諒其誠特贊允之公去南後代者人居其邸舍覩其扁鋪牆房整飾如新益嗟嘆公德云丁卯穆宗登極起公南京工部尚書任改南京吏部尚書尋改南京兵部尚書參贊機務時士紳資適逢世多喜興事就功而公故任眞自如恪守舊章填以寧

靜往時脫巾士懷悃恩威率戢戢斂縮毋敢譁者已  
已公以七十引年乞休 上溫旨慰留朝士榮之庚  
午公復乞休疏凡四上 上廉公情懇特允馳傳歸  
歸三年而公以天年終蓋癸酉十一月二十三日也  
有司以聞贈太子少保謚端簡祭葬錄廕悉如制於  
戲仕宦如公可謂善始善終矣惟公初仕以進士高  
第卽膺華選不爲進越顧薄臺諫之選不就而甘心  
外補及守州時治行誰復最者乃踰考而董董晉地  
官郎地官郎卽今才俊人蔑視之以爲俗局公遂巡  
斯曹凡幾年所而始遷少參又五年而始進臬副又

幾年而始進藩叅曾無積薪之嗟且蜀暨粵西滇南  
皆險遠仕宦人所不樂者而公怡然安之已留左右  
轄而得廣東福建廣東福建又皆脂膏地人易黠饒  
而公居之顧益嶢然中簡晉巡撫纔合輿情然已後  
矣後由南少司馬得轉北少司馬由北少司徒得晉  
南大司徒皆緣時艱人共避之而因以及公豈非遇  
時而命也哉公生平廉謹好修而恥矯異以掠名篤  
中隱厚而羞詭隨以阿世通敏中瑩而不炫智以矜  
賢以是自爲州牧敗歷藩臬所如落落更未得一汲  
援在宿且見抑于漕臺在粵西且見刺于部使者而

譽卒殷殷隆起逮沒世而人無瑕疵由斯以觀公之  
初滯而後達遇險而卒夷始晦而後章命也夫夫彼  
汲汲於速化戚戚於蒙難噉噉於就名者直與命相  
持耳竟何如哉公嘗自謂生平宦業多得之宿州一  
任語後進以仕宦要領曰惟毋附麗自立而已既官  
藩臬四五任後家用常窘時時稱貸戚里中顧嘗謂  
人曰居官廉之一字難哉難哉吾猶有規云公於平  
時知交及相連姻婭雖微賤遇之如等夷雖不肖撫  
之如才賢恒言曰親者無失其爲親故者無失其爲  
故耳公無風疾倏有中表喪躬往殯之其家不能除



舍而野宿以此中寒病歸歸而有鄉同年范姓者來訪其人衰老且貧公心憐之又力疾與傾倒數宿疾以是增劇而終距生弘治庚申五月十九日蓋春秋七十有四耳公以鞠躬敦行爲學不雜異教晚年嘗祈曰吾不願年多多一年增一年過矣古云多壽多辱吾有味乎其言之也是可觀公之篤脩且達矣天臺生曰余聞鄉長老稱說建德公世載醇德蚤世濟南公秉家政其馴行孝謹不減端簡公云端簡公始師里中三泉董公某董公故清脩苦節人也而又繼師少保莊襄公其父兄師友淵源所漸如此又聞舉

鄉試時報至而了不色喜口中猶惛惛然睡也長公  
訶之曰此何時而猶然惛惛耶跡公少年志念已深  
一舉不足介於中矣大受者故若此仕宦奕世閥益  
高而子姪至今恹恹飾謹不少加於寒素豈緣誠飭  
訓誘哉其濡靡所從來久遠矣

南京兵部尚書郭襄靖公應聘墓誌銘

陳經邦

公諱應聘字君賓居華溪因以自號其先世汾陽王以勲德著于唐孫嵩避咸通亂南徙入閩家新寧之郭坑傳十六世惟高徙莆之魏塘遂爲莆人公高祖師凱曾祖宗訓皆隱君子祖伯玉治經術弗售考溫舉鄉進士官廣西太平郡倅祖考皆用公貴贈資政大夫南京兵部尚書太平公初取黃淑人繼室以卓夫人凡三子公其季也六歲就傳卽凝荷別羣兒七歲而太平公卒宦所公奉觀歸刻意力學嘉靖丙午

舉于鄉庚戌第進士授戶部主事與積芻督府咸寧  
侯部下橫索芻商賄公持不與以去就爭之咸寧稍  
最竟不能釋憾於公司庚通州適米涌貴公令輸者  
得納絹及賈損則亟糴充庚而歸羨金千 朝上下  
交利焉司惟清源以不涅稱司驗糧能抑貴璫清宿  
盜稍遷員外郎郎中在署凡六年拜南寧守南寧故  
盜區公單車馳赴諸不便民者悉罷之繕甲增戍盜  
不敢跡其界發左江兵佐制府平東粵寇得賜鎡金  
三殿役興臺使者檄公購漆八十萬觔旬日而辦已  
未壬戌再覲皆以治行尤異沐褒燕當世榮之遷四

川按察副使備兵威茂崖棧險艱墜溺相藉公至下令刊山鑿石築孔道若干里行者德甚稱郭公路松藩備兵使者缺公兼領其任西戍素騎數徼我厚資歲費金緡累鉅萬不且羣噪公召諸番面諭福福爲立賞格閱賞物而卻無名之求諸番感威信各拜舞驩謝去岐山鷲木如二寨久爲逆思公以計蕩平之遷東粵叅政守嶺南時流賊犯增城執辱前守吏公至輒發兵逆擊破之二源羣盜僭號僞授肆掠思潮間公率所部兵從制府吳公大破之晉西粵按察使尋晉右布政使忠州築酋黃賢相與思明酋爭地公

密授略兵憲譚君購內貳而攜外援遂夜禽賢相轉  
左使中丞殷公彌古田寇公以綜餉叅畫功拜金幣  
之錫亡何代殷公任公旣授節鉞志清嶺徼首奏忠  
州去土設流以終前功 詔報可予州名新寧羅陽  
酋韋金彪之父若弟贖彪急彪走獲之萬箐中黃韋  
二酋不煩兵而俘公力也府江峒徑數出敘江上且  
破永安鹵其尉公憤然請集土漢兵六萬分水墮四  
部進討悉殲之分設土司井賦其地捷聞賜金加祿  
且任胄子復平懷遠諸叛徭拔巢壘百餘乘勝剿永  
寧寇獲首虜千級因上懷永善後十事 上從之下

璽書金幣嘉賚焉晉少司馬填撫如故已 召人  
爲少司徒遭太夫人憂歸守苦由絕意仕進久之十  
寨餘徭寇武宣勢復熾 上念公熟粵事以少司馬  
起公于家再撫西粵賊聞之卽解竄公請留宿將假  
土酋韋應鰲世守之而徭復靖居三年晉右都御史  
兼少司馬總制西粵先是東山營卒亂聞公至爭丐  
降公戮其元兇它釋不問覽東事慨然曰人心獨幸  
亂哉培兵腴民咎實在上乃作旌廉杜餽功令頒誠  
將吏諸將吏廩廩亡敢撓一幣誄制府者公閱兩粵  
疲供億汰轅門冗役悉蠲津澳諸稅以利民於是粵

人訢然若更生云 召掌留臺籍餘餉五萬一千有  
奇 上之尋晉大司馬叅贊機務舊京尺籍久耗公  
疏請廣選鋒增徼巡又條勾軍四議俱報可時 上  
注公甚殷而公業已憊懇乞骸骨章五上不得已聽  
公還幾其瘡而復用之公亦孳孳憂國將歸之日猶  
上安民四議以應明詔比抵舍病轉劇僅十餘日終  
于寢享年六十有七訃聞贈太子少保賜祭葬公起  
自節旣都榮膺未嘗有兼珍襍采之奉謙抑不伐  
踐踐儒生居常獨處一室足不踰閭澹泊寧靜蓋其  
性然也出入中外餘三十年削跡權路凡遷陟率以



久次得之其起撫西粵政尚寬大與時殊趣諫臣劉公臺坐戍粵公周恤其生死棟國者嘆其貳已屬耳目偵之而公屹不爲動竟以完名終其身宦輒所至輒有惠迹兩粵之人爭尸祝之公平生論著尤長於條奏有粵西疏議總制兩廣疏議留樞疏草西南紀事邊防紀實諸書行世

又傳

海瑞

傳者傳也必其人足傳又得其人傳之公足傳余不敢謂足傳公顧非公余孰傳之公郭姓諱應聘莆三孝子後起家世廟庚戌進士試戶曹值虜虹入仇

咸寧佩大將軍符璽之大驕黠士新進不習邊五塲  
草積郊外恐甚以不足當虜炬也又不勝大將軍啊  
轅無願就職公忼慨曰主憂臣辱何辭難領明智安  
仁最劇二塲大將軍果縱部索賂不與禍將逮公竟  
不與籍草三車一輪幕府一貯部曹一至閤治疏且  
聞爲孫司徒所持公更多箠索者亢爭橫爲戢公兢  
兢無能撫摺六載一郎乃出守南寧公木強不巧宦  
當分宜比大將軍曹郎挾賂伺分宜門如市公又不  
與輸邊推關累累空橐往亡謁返亡贊分宜以嶺外  
兩寧郡投之南寧故守連歿且歲寇帑脫行也公至

寧儉潔無異郎官兩覲空手不謝寧人德公淡骨髓  
寇屏界分宜不得隙乃又遷之威茂備兵公首單騎  
諭吐蕃種落正賞格先是要賞禍備兵者丐服如東  
豚文之乃叅吾東藩到境掃從化龍門二源諸寇西  
人德公自南寧吾東人德公自此始于時分宜敗公  
復西按察尋轄藩復新寧永寧二州皆公劈畫晉填  
撫討府江懷遠乘勝芟洛容流竄下堅巢逾百壘斬  
馘千萬亡算粵賊如落葉掃一番更多一番公薙補  
次第後迄無待再掃難不在捷伐在再後不在多籌  
計在杜腴剝粵人德公甚功宜麟閣江陵者專權喜

操切東吏嚴東溼公不黨如分宜時十寨連亂起公憂居再撫公不謝故吾江陵新法自負利百世積鏹穀公曰何啻膚髒腹奏損數十之七禁郵傳公曰何責黨平原奏免粵過往乘傳罰毀書院公曰何嫁禍聖賢籍復白沙新建諸哲祠且搯文以祀時御史劉臺糾江陵怙喪褫職憾未已嗾爪牙飾呂逮戍隸粵郡臺過公郊勞爲僦居贍餼歿舁祠表模贖其屬歸蜚語入大忤江陵江陵死其黨俱敗公得免總制兩粵命卽日下雨粵故苦奉大吏將領不服打围日計剝軍幾何幾何也時遂有東山之變公至未言討賊

先下令旌廉杜僥以身擔持半通入吾私耶吾若法  
半通入吾轅門吾若法將吏人惴恐士民人加額東  
山叛卒悔禍爭丐降公顯僇十渠魁劾概舊債特空  
名緹騎鷹逐薦賄者悉投竄大搜爬弊竇橋稅澳利  
捐洗無留粵人始知 朝廷置大吏爲生我也踰年  
召總南御史臺旋莞樞則 天子念豐邑重不令吾  
粵人專公公入留都貴人爲減驕從余至公偕訂崇  
質進貢黃馬快船諸中貴視爲私艘挾貨牟利故事  
也公峻裁抑振軍實悉考選具殫心力病發連四五  
疏乞骸猶引余榻前曰勉矣 國家事語刺刺若無

恙者乃歸不旬月訃傳矣嗚呼公余所共戮力王  
家矢心末路者公歸乎歸而逝乎何遽也宗社維  
休不公憫遺余不知也余不知也余壯登朝爲郎  
而蹶蹶再起起再蹶幸不死終老菟裘公制粵于余  
以清風洗拔以孤忠汲引公環召余亦蹶起聯合于  
南薑桂聚味恨相得晚余初兩人者相姓名未得杯  
竿也公不余私余推轂余亦不公私公執鞭公已矣  
余後死余不公傳其誰傳海瑞曰世道大氏壞在貪  
風俗人心只是念頭差遂以貪畢竟其身流蠹風俗  
公之不貪三白首淹恤遲馬後鞭處咸寧分宜江陵

際難哉難哉而進退完珏是不貪位自公開府夷貊  
停櫓珠胎斷督丘太宰嘗問余郭司馬填而粵地增  
毛幾尺良然是不貪利前後削平夷獠功滿東南粵  
享寧宇誰造也孫膚寂若駒駒儒生是不貪功嗚呼  
三不貪可以風矣公何以死哉公死不忘國家公  
固不貪身後榮名者也

贈太子少保南京叅贊機務兵部尚書月溪陰

公武卿神道碑銘

萬曆十六年某月日南京兵部尚書月溪陰公卒于  
值公諱武卿字定夫月溪其號先世元萬戶天興來  
自湖廣之崇陽則內江陰氏所自始也萬戶公四傳  
至柰柰生璽公之祖璽生汝夏公之父也祖父以公  
貴贈都察院左副都御史祖母黃氏母洪氏併贈淑  
人公生而岐嶷七歲卽能爲文年十五補邑學弟子  
員嘉靖乙卯領西川解士額丙辰連第南宮成進士  
初授南戶部主事丁內艱復除刑部陞員外郎甲子



陞陝西提學僉事丁卯江西右叅議分守九江戊辰  
本省按察使之副尋督學廣西壬辰福建左叅政甲  
戌江西憲長丙子陝西右布政尋轉左從二品目三  
載兩推南贛保定巡撫皆不授繼推南京兆始授巳  
卯典試事闕中轉太常卿壬午奉 勅巡撫保定癸  
未以左副都佐內臺理院事轉兵部右侍郎尋又卽  
轉左乙酉陞南工部尚書丁亥改兵部奉 勅叅贊  
留樞機務戊子夏偶一疾竟不起享年六十有幾公  
由郎署至八座居官若干年事當爲未嘗不力于爲  
其或不當爲也亦未嘗輕于爲初爲郎刑部三尺法

奉惟謹兩爲督學使者所至能得士分守九江也鄴  
湖故盜藪賴公擘畫一時稱如淨練焉在廣西署臬  
篆則贊佐督撫殷公平徭徭在閩則與叅將俞大猷  
平倭亂于興化兩皆受 上賞繼總憲江右則黜貪  
墨抑豪右貞度肅條忌者不能中公傷其歷左右轄  
以旬宣關陝也通民利而錢法大行屬歲校又大著  
勞績于荒政因星變修省考求利弊十事一曰給戶  
田二曰定本折三曰謹收支四曰議儲蓄五曰處處  
糧六曰覈屯課七曰驛清傳八曰備邊餉九曰辨賢  
否十曰嚴吏卒議上兩臺盡措之于行又能贊佐督

撫董公殄除妖賊以白蓮教惑衆者太常卿奉 今  
上耕藉田郊 天祀地謁陵享廟事事循典故行無  
失禮前後蒙賞賚有差撫保定則勦平劇盜行劫鉅  
鹿新河間者畿輔賴公寧謐又以清丈田糧議處賑  
恤清理河道湮塞申飭三關墩堡虜衆內附有功也  
欽蒙叙錄所賞賚甚多而權璫之藉沒惟公嚴覈惡  
黨馮佑等財產無敢一有寄匿者 上知公能奉法  
無私將大用公于是內臺之命亟下矣轉兵侍則督  
修 慈寧宮兼督 壽宮工程又運籌遼左有功滇  
南緬捷與有功而科臣兩閭保定邊竝亦奏上公邊

功蒙優叙優賞者蓋又一歲中凡四五爲大司空于  
南也應詔敷陳八事織造則議減免拖欠則議蠲免  
物料則議暫免以至議寬造器物議查復樓薦議改  
折皮張乃若杉楠花梨等木議停解停取種種皆爲  
國爲民之言後因僭運糧儲而敷陳五事也一請關  
防以肅漕輓一查工匠以濟工作一覈底船以杜推  
諉一慎僉選以嚴責成一清船號以便催償此則有  
益于清政者改兵部欲修舉寔政又敷奏凡六條一  
補丁壯以寔行伍一徵折色以買操馬一增火器以  
固營壘一優撫馭以重巡遊一嚴捕盜以翼都會一

稽職守以肅官常此則有益于兵政者後因快船得所以處而欲議及于黃船也又遵明詔陳十事一曰分大小黃船之差二曰減太常官之差三曰減駕船之軍額四曰處原駕之正軍五曰會計行糧之數六曰酌量應募之直七曰議接船之銀八曰議修理之費九曰派編應詔快船十曰撥差應屬兵部此則又有益于船政者也方竭盡心力知無不爲以靳無負叅贊專任不謂其遽至是可惜也奏聞 天子悼公不久于位才可用而不及究其用也贈公太子少保他卹典竝優厚

容所吳公文華行狀

葉向高

南京兵部尚書容所吳公卒于家兩臺使者疏聞大  
槩稱公純德名臣卹典宜備厥嗣太學君將以得請  
之日葬公乞銘于鴻筆而以小子高爲公門下士使  
具狀焉小子自蚤歲辱公非常之知得藉手而狀公  
甚幸公諱文華字子彬別號小江晚更號容所先世  
自光州固始入閩居岳山始祖對爲施州守再傳士  
興徙漣江遂爲漣江人士興數傳至寅訓導太平訓  
導生處士公瑋處士生廣西按察司副使公世澤公  
以右都御史秩滿處士副使皆贈如其官副使娶贈

夫人陳氏生公公十七補諸生卽爲督學錢塘田公所器重嘉靖乙卯舉于鄉明年第進士當授北曹郎以母便養乞南得兵部適三殿工興內璫主進顏料牒所司具舟三百艘公裁其半璫怒甚脅以危言公徐應之曰中貴人欲多索舟爲市販地耶夫使舟不任載者責在郎使舟任載而故爲逗留以乏上供者責在中貴人璫無難逡巡去是後凡進奉舟皆預其數所省郵傳金錢無算頃之景藩之國道留都復當具舟藩邸從人橫甚道路苦之時公已徙督草場他卽在事莫敢任尚書以屬公公代綜其役事事治

辨問謂王傳與約非

王命而私要素者請治其罪

傳唯唯

一夕而去無譁者其督草場屬振武營變後

尚書創前事多所假借卒有訴增租者卽爲奏減報

可矣公得檄持不下曰此其地固昔瘠而今腴昔乾

沒而今受賦者也稅額有定何可更且此曹驕宜基

以法曲法以長驕憂無日矣尚書不能從未幾去公

從吏代者疏請如舊制乃已居南中六載才名蔚起

爲諸曹冠矣亥晉湖廣提學僉事端模範絕請托士

子相慶得師初抵任業迫試期公疾走列郡晝夜校

閱所衡臨錙銖不爽楚人至今稱賢學使則云前番



後吳喬者關西喬公世寧也乙丑晉四川叅議分部  
上川南武定叛酋鳳繼祖者滇部也逃入蜀界兩省  
合誅之連歲不能得用公方略乃就擒天全招討副  
使楊時譽以承襲爲招討使高定所困相仇殺久之  
邊境騷然公檄諭二酋咸悔懼因代時譽請兩臺俾  
得襲事遂解明年晉廣西提學副使其教粵士如楚  
而以粵俗樸開誘爲詳已巳晉山東叅政歸里中省  
侍太夫人留連踰歲乃履任屆滿泉乏人公兼攝數  
篆督儲清戎課吏折獄咸咄嗟辦中丞眞定梁公服  
公幹局特疏薦諸朝有貞勤忠亮之語人以爲核

踰年晉按察使仍山東隨晉江西右布政使釐正賦役十餘事眾咸便之歲癸酉比士公職之調總校易禮二經所收士皆知名其冬晉河南左布政使以扶侍歸未抵任適大計羣吏天子修曠典旌治行異等者二十有五人公爲之首璽書金幣下大梁士林艷之大梁故苦藩祿計畫罔措公至則酌盈虛嚴出納禁羨耗積逋盡輸諸宗胥藉以給先是詔祀革除諸臣有司寢未舉公慨然曰此褒忠盛典也胡可緩檢汴志得鐵公鉉等五人建祠祀之又下檄修太昊陵及濬復南陽水利它興革甚衆皆持大體務

裨益于民乙亥晉應天府尹在汴所積羨金萬餘藏  
吏具籍進請納行李不則牘而白之臺使公不應第  
以籍授代者充公帑而已其廉不近名如此去之日  
宗藩及汴人扶攜造送至車輅不得行途次晉右副  
都御史巡撫粵西粵西方旱災流亡載道公疏請賑  
恤不待報已先發廩庾矣仍令人齎帑金乞糴隣省  
稍倣常平法給散募民能墾荒者予牛具種子地利  
益闢饑而不害已乃覈田賦均驛傳飭兵戎疏設昭  
平縣建養利州學割武緣縣屬之思恩移兵備于鬱  
林增河池同知經略種種足規永利六平案徇突出

爲惠公檄叅政陳應春剿平之嶺斬三百七十級昭  
平賊首黎福駐父子聚衆剽掠執孝廉歐鳴鑾索贖  
聞公至懼釋之公佯爲不聞會督府徵師討羅旁兵  
盡東公陰留三千人屬裨將韓文啓掩擊之斬福庄  
乘夜攻下五指白冒諸峒斬一千三百餘級俘二百  
餘人捷聞陞俸一級賜金幣隨招撫餘黨二萬餘人  
卽其地建營堡二十一得田二萬六千餘畝分授新  
附及諸戍兵事聞賜金幣又以撫降岑溪諸徭功賜  
金幣蓋一歲中論功受錫者三亦異數也其後北三  
功尤奇北三者柳州賊巢也聚黨萬餘人慄悍善騎

射號剗馬賊諸將縮縮無敢嬰其鋒公策之曰賊強而負固宜智取毋力爭適河池哱咳有警公選卒七千餘俾叅將王瑞倪中化往剿旣得捷卽馳檄諸將曰吾名攻河池耳意固在北三今河池捷北三謂我兵疲且休矣必不我虞可擊也遂督兵分道進賊果不爲備連破七十餘巢斬四千八百級俘獲稱是是役也兵不及萬費不踰千因糧于敵不洽月而蕩累世之巨寇本兵偉其功擬策勲告廟而督府某者相國私人也當公舉事時謀甚秘督府不及聞相國欲以爲督府功度不可乃薄其實僅賜金幣錄一千太

學生戊寅晉戶部右侍郎以都御史報滿沐恩如令  
甲隨以太夫人春秋高陳情終養時相國方奪情諸  
言省侍歸養者皆惡聞縉紳相戒無敢啓口公獨觸  
忌不顧時論趨之太夫人聞公歸喜甚夙疾爲瘳再  
踰歲乃逝服除守臣以闔時相國沒矣空諫交章薦  
公癸未起兵部右侍郎仍撫粵西夷蠻夙戢公威惠  
境內晏如獨湘源熟徭苦催科謀爲變公檄諭之遂  
定田州酋岑大祿與母梁氏不相能梁徙避他所隣  
酋合聲罪欲瓜分其地公曰此亂階也亟諭大祿迎  
母歸好如初凱觀遂息其年晉刑部右侍郎徙左皆

需代不得行隨晉右都御史總督兩粵故事郡邑吏  
歲時獻遺稱觴上壽靡費不貲公一切禁絕幕夫經  
用自軍市租及常賦以奉戰士其他榷稅夷舶所入  
有司不敢問公悉歸諸官毫無染指又以其贏代保  
昌浮糧八十石民藉以甦轅門持戟之士以數百計  
強半空名徵其餉充橐公悉按諸空名者罷勿餉其  
存者以隸裨將使訓習宿弊盡除粵人稱督府潔廉  
公爲第一歲乙酉淫雨沒廬舍城不浸者三版民號  
呼水中公親乘城集小艇渡之發倉粟哺被災者又  
請留餘金七萬餘以備蠲賑虔吉二郡故行粵鹽有

議奪以予准者公疏爭乃已粵人至今賴之督粵三  
歲餘屢有平亂功其最著者如平樂營兵叛公會吳  
中丞盡殲之府江諸徭爲梗檄大帥呼良朋深入征  
之捕斬千餘級懷集賊首嚴秀珠剽掠封川諸邑公  
徵兵若爲西討者以元旦進剿斬八百餘級二捷並  
聞賜金幣錄一子太學生倭奴流竄海上發舟師與  
戰斬七十餘級餘悉沉溺死捷聞賜金幣程鄉妖徒  
劉青山煽亂公捕其魁七十餘人寘于法餘悉就擒  
奸民陳鏡等集衆盜珠公矜其愚愷諭散去獨鏡等  
拒敵捕斬四百餘級二捷並聞賜金幣惠州賊巢率



洞者最險遠王文成平洲頭二十四寨獨岑洞羈縻撫之至是賊酋江月照益恣橫肆掠公分布諸將先伏要害葉月照擒之斬二百餘級捷聞賜金幣瓊州黎出掠追將渡海剿之以訓導林立知兵使叅軍事斬八十餘級降九千餘人羅旁餘孽復出以兵屬副使鄭人達捕斬一百餘級二捷並聞賜金幣方公未督粵時山海諸寇出沒縱橫蹂躪州邑官軍雖往往小捷然得不償失自公在事過發遠撲無使滋蔓每命將出師授以方略輒懸合機宜往無不克其所撫納降附十倍斬馘尤洞於廣受方珠盜起有蜚語廣

州主客兵欲叛應賊者上下皇遽公不爲動第移鎮  
會城合諸營兵操練摘實如平時密捕海上謀一人  
磔以徇內外帖服往粵有軍興輒苦餉公從容籌畫  
寬若有餘經費之外積金至十九萬餘諸節縮供應  
之數不與焉海忠介公嘗過泊所顧瞻堂宇嘆曰今  
日方成衙門意蓋獨推公也丁亥秩滿報績沐恩  
如令甲其年晉南京工部尚書粵人爲祠以祀所  
削平經畫處皆磨崖鐫石紀其功明年服任卽疏請  
蘆課之久逋貧不能輸者及墾地之漂沒者咸豁除  
之不數月改南京兵部尚書叅贊機務南兵驕又脆

不任戰公畢力振刷稍稍改觀會太湖劉汝國倡亂  
公念南國根本地宜周防乃疏陳六事練兵葺械選  
鋒修城重權嚴警皆保障至計下部議從其四天策  
衛卒以儲饒腐邑囂訴主者公計若促治卒罪且益  
囂或遂階亂不治則非法乃召倉曹諸役及囂卒渠  
魁六七人立庭下數諸役曰士卒寄命于食與守之  
不嚴爾無所逃罪叱杖之卒以公爲已庇也匍匐謝  
公更數卒曰彼役誠有罪爾曹奈何不白之官而遽  
譁在軍令譁者死三尺俱在爾自圖之咸股慄祈哀  
公曰今姑貸若薄示懲乃痛杖之徙戍他所并黜其

長事遂定中璫有怙權恣睢者爲言官所劾上怒

杖言官公率南九卿抗言宜治璫罪宥言者語甚切

至不報遂引疾乞休疏三上乃允仍令痊日守臣以

聞公旣去而司農上會計狀獨公節省最多蒙旨褒

錄後詔舉邊才南太宰餘姚孫公及諸臺諫共推

轂公癸巳起南京工部尚書朝紳方望公再出而公

一意堅臥懇辭者四乃仍以舊秩致仕家居優遊十

載無疾而終旬日前邑人見東方星墜大如輪兆在

公矣距生正德辛巳年七月初八日得年七十有八

公弘厚之德出於天性溫粹之氣溢於面目終身未

嘗言人過失發人陰私雖卑官下吏安有觸忤亦笑而受之其有詿誤必曲爲掩覆惟恐有傷至于提躬履道則矩矱截然不爽尺寸辭受交際尤爲介特每仕宦往來必經會府公輒從間道不欲一錯趾公庭或竿牘相訊亦絕不及私親朋有不得已祈請者輒贈以金不輕發片刺也通籍三十年粹然完節未嘗有纖瑕寸類挂人牙齒當江陵敗公卿在位者十九波及獨公先事引去不入國門明哲見幾人莫窺其際晚年益難進易退持大臣風節其以司空再起相知者更來勸駕長安貴人貽書相屬謂公一出則揆

端可俟公俱不答虛尚書席兩載而後得請蓋于功名之際真澹如也在林下謝絕賓客蕭然一室左右圖史卽邑令不得見而惟懿親些人及門下士最厚者過訪相接對爲歡而己居官無一錢而席先世遺貲稍有餘卽以佐交遊戚屬之貧窶者買學田百餘畝給弟子員建浮圖于邑東以完風氣助常平濟河渠修橋梁皆竭力爲之邑諸生某失令意坐以殺人抵罪衆稱其枉賴公乃得白有舉明經者耄矣學使者欲奪其饋公憐而拯之皆不使其人得知介而和嚴而恕屏絕干謁而常爲德于冥冥沒之日縉紳嗟

惜鄉里奔走赴哭如私親也生平寡嗜好獨詩歌書  
法至老猶習大得唐晉人三昧所著有督撫奏議留  
都疏稿濟美堂集藏于家配王氏御史德溢公女早  
逝贈夫人繼陳氏封夫人子三皆以蔭叙爲太學生  
葉生曰史稱黃叔度澄不清淆不濁韓魏公言及橫  
逆事則詞益平氣益和余心想其人以今觀公豈異  
哉近世名公卿賢者多矣然議者猶不能無得失獨  
于公翕如也豈徒以功業之盛出處之正要必有不  
言而成蹊聞風而向往者耶公爲行常畏人知卽家  
庭不使聞故多軼不傳所可得而具論者如此

資善大夫南京兵部尚書贈太子少保郝公杰

神道碑

王家屏

余嘗嘉慕古社稷臣求其人當世而不多見見今大  
司馬郝公焉沉毅有識略歷官中外四十年孳孳國  
家之急殫精畢力以奉一人曾不以誹譽險夷爲勸  
阻用肩荷鉅重匡濟艱危光輔三朝忠勤一節所謂  
社稷臣非耶而傷哉已矣訃聞 天子愍之賜諭祭  
二壇遣官治葬贈太子少保廕一子國子生踰年公  
嗣洛國等特胡進士世廕所爲狀屬余銘其隧道之  
石余爲之歎歎隕涕軫云亡之悲而不能自己也何



忍辭公諱杰字彥輔號少泉其先山西交城人元御  
史中丞天挺之裔也入我明諱鳳舉者仕長蘆運判  
生旺旺生文達始占籍蔚州以季子溫泉公銘貴贈  
如其官溫泉公舉鄉試尹衡水任丘二邑擢福建道  
監察御史按滇南所至有聲配李太恭人生二子長  
本次卽公少穎敏能文章嘉靖壬子秋魁省闈丙辰  
成進士授行人辛酉選御史遣視三閩一踰溫泉公  
之跡人以爲奇癸亥按貴州丁溫泉公憂歸丙寅服  
除補河南道按順天入掌京畿道監戊辰試事會新  
鄭高公拱再相以公嘗露章斥其器量不堪端揆將

借考功法中之公知不容請遷葬去壬申新鄭罷起  
公原官復爲柄臣所忌出爲陝西憲副滿考得受誥  
命贈封父母丙子遷江西參政改山東丁母憂歸庚  
辰服除陞浙江按察使兩定兵民之變轉陝西右布  
政將行兵民遮道泣留車枳不得發居一歲轉山東  
左忌者引浙變論鐫一級乙酉起遼東苑馬寺卿兵  
備海蓋督撫上言兵備重官也以同卿兼之兵備輕  
以材臣處其地材臣復輕是兩負也議改公山東叅  
政兼苑寺卿苑卿之重如此尋以勞績賜金晉按察  
使己丑拜都察院右僉都御史巡撫遼東其年虜十

餘萬騎入寧前公督輕騎擊走之明年春虜悉衆犯遼陽公督諸將追出塞斬首虜三百八十餘級鹵獲器畜以千計捷聞詔賜白金文綺廕一子國子生其冬虜二十萬騎入河東分遣諸將禦之斬首虜百奪其所掠人畜以還辛卯春虜約束西部謀大入公遣副將李平胡及其未發合諸將兵出鎮虜臺掩擊之斬首虜二百七十有奇輜重稱是在遼三年繕塞修城扞防之備甚設前後條議邊事以十數皆安攘大計力能措諸事效非襲竅言閔臣嚴公課最詔晉剛都御史賜白金文綺壬辰晉兵部右侍郎兼僉都御

史總督薊遼無何晉右都御史入理戎政以抗議倭  
事不合徙南京戶部尚書移疾歸旣歸捷聞謝客其  
園結廬雜植花竹讀書鼓琴其中泊如也戊戌用薦  
起南京工部尚書尋改兵部參贊機務募兵補伍軍  
容改觀而是時留都大僚虛席過半公復兼攝他曹  
篆臬畫旁午竟以積勞感暑濕病歿兩乞骸不許萬  
曆庚子八月十七日薨於位距生得壽七十有一公  
夙負志槩始進盟心精白期不爲勢賄移兩使親藩  
僇遺一無所受按部關輔擿發姦貪墨吏聞風股慄  
歲大稔痛裁供億爲諸部使先且檄郡邑各以方略

佐賑饑民用甦虜闌人冒黎糝將吏之不設備者寘  
於法邊人快之中璫採免寶抵踐稼擾民疏陳其害  
罷去楊忠愍公繼盛以擊相嵩不勝死爲請建祠祀  
之得賜額曰旌忠時公方劾新鄭爲所銜因表忠愍  
以見志云官臺察十年操三尺凜凜每朝下或行部  
還輒止宿公著中竿牘無敢及門者又侵幹局刷卷  
時宿牘叢委憲長屬公鈎校旬月而畢出爲監司衆  
爲公屈毅然受事卽所治盤錯斧斷理解游刃有餘  
浙營兵以減餉謀羣擁撫臺吳公於軍中刃脅之公  
聞變疾馳而前諭以利害悍卒斂戢吳公獲全無何

枕民以火甲偏累控狀直指不得伸構惡少夜縱火  
燔掠公署反貴豪家闐闐洶洶公於兵燹中走衛直  
指而除勒營卒捕爲亂者收繫獄明日修其魁衆乃  
復戢其填遼務遠斥堠虜近塞輒先謀知其情部署  
諸將宿勁兵以待虜入互爲犄角動應指揮靡不以  
全收勝者苟違節制雖驍敢戰如李平胡矜勝債師  
與怯懦逗遛者同簿問功罪不以相掩以是諸將憚  
公爭出死力自効蒐簡卒乘務精而犒賞務豐儲峙  
務裕司農議損度支金力持不可前撫臣顧公嘗慮  
軍餉不時給用馬市貨本爲母以時斂散而操其贏

謂之子銀久寢羨溢積且十餘萬議者遂欲借抵苑  
寺馬價公言設法恤軍而奪以予苑寺軍且立槁格  
不從遼至今賴其利焉倭覺起首急朝鮮之難徵調  
兵餉數道並發比還朝獨謂封貢非宜議與本兵石  
公左其後事債而朝紳服公之先見也再起留曹計  
安根本奏裁殿帷浮費以萬計而都城房號錢中貴  
欲取以內供公謂此錢自有經費取之恐城中民閤  
然動搖力爭得免漕船舊有皆雇役而運官欲抽丁  
領之計當破資產者萬餘家亦以公講折而罷都人  
翕翕咸頌焉

南京兵部右侍郎李郁

郁字文煒河南洛陽縣人由洪武丙子鄉薦授四川  
邛縣學訓導秩滿超遷工科給事中舉正駁違無所  
顧忌坐事謫戍五載 朝廷方有營建將取材於巴  
蜀廷臣以郁薦起掄探有方應期而集洪熙改元轉  
禮科給事中尋遷光祿寺丞復出爲長沙知府賜璽  
書便宜行事宣德八年召還陞行在兵部右侍郎又  
二年奉命鎮守山東無幾持節使交趾封王還理部  
事正統丁巳丁內艱復闋調南京兵部右侍郎至是  
以疾卒遺官諭祭命有司營葬事郁有才智臨事明



決多歷世故鄉之後進自謂不及云

兵部右侍郎虞祥傳

祥蘇州府崑山縣人由舉人歷官金華訓導上虞敎諭皆以能敎名宣德間選陞禮科給事中時慶壽寺僧覺貴創毘盧閣高出數十尺祥以寺近皇城非官抗疏論其罪 宣宗怒命毀閣下覺貴于獄正統改元陞通政司左叅議敎奏詳明八年進戶部右侍郎尋轉兵部命巡撫畿內民疫所至剷除貪酷存問疾苦人用以寧旣還以疾卒于官遣官祭葬

通議大夫南京兵部右侍郎拙菴宋公琰墓表

李賢

公諱琰字廷珪拙菴其號也系出唐廣平文貞公之  
後世居邢州之南和唐末有爲浙之奉化令者因土  
著焉詩禮相承歷宋元弗替曾祖起潛爲元鄆山書  
院山長方國珣據四明卽歸隱祖允宜性勤學尤喜  
成才爲塾以教鄉族子弟有遺規焉父諱原亮人稱  
竹軒先生祖與父俱以公貴贈通議大夫兵部右侍  
郎祖妣蔣氏妣朱氏俱贈淑人公生于洪武壬申自  
幼穎敏甫六歲讀書日記千百言遂能吟咏得句甚

奇鄉先達嘆異之永樂初爲邑庠生益肆其力淹貫  
經學旁通子史凡陰陽曆數卜筮相法咸造其精字  
書遒勁不下古人年十七遭母喪哀毀過禮時弟琬  
甫四歲撫養惟勤不貽憂于父居邇男於行義時疫  
大作姑家尤甚人皆遠避無至門者公曰若此噍類  
絕矣患難不恤何以親爲遂宿其家躬治湯藥以全  
活之卒者出地葬之鄉間爲之感化永樂乙未登進  
士第選爲翰林庶吉士預修性理大全書未幾 仁  
宗皇帝以 太子監國南京選公隨侍旣而 太宗  
皇帝知公之才復召還北京預修 永樂大典書成

賜白金文綺授中書舍人泄事翰林 宣德皇帝御  
極遷禮部儀制主事仍泄翰林事宜德庚戌以親老  
懇陳歸省未閱月復遣使召還正統改元 皇帝聞  
位特選公入史館纂修 宣宗實錄未幾遭外艱痛  
踴幾絕四年秋服闋至京 上以公累朝舊臣轉吏  
部考功主事日侍禁廷凡中貴人幼而秀者屬公訓  
之公雖被寵光達盛衰之理益畏懼不安屢乞外補  
或曰如公遭遇千載一時何乃自疎如此公曰以吾  
所見當如是古人固有不俟終日者九年春遂還河  
南布政司右叅政時汝陽不雨禾將槁蝗復大出官

民憂懼走報藩司公大驚曰尚可緩乎卽日往視之  
且自誦曰匹夫一念之誠尚能格天況吾任承宣之  
職乃齋嚴致禱方畢民忽報云有鳥數千成陣而下  
延頸長足名曰禿鶯啄蝗無遺已而飛去越明日太  
兩官吏士民交相忻忭景泰四年冬以考績來京轉  
太僕寺卿尋遷兵部右侍郎公益勵忠勤士林推重  
未幾賜誥命進通議大夫天順改元上念南京根  
本重地以公老成往淮部事越三月以疾卒于官壽  
六十有四

南京兵部左侍郎馬顯傳

馬顯字文明直隸廣平縣人正統年進士授給事中  
扈蹕土木歸陞都給事中尋轉河東鹽運使擢  
四邇布政使秩滿會蠻寇起巡撫者奏復留三年陞  
南京兵部右侍郎支從二品俸九年進左侍郎成化  
二十二年請老歸弘治五年以詔例加散官一階十  
四年七月卒賜祭葬如例顯居官勤率性雅清介蔬  
食布袍至貴不易嘗巡視南畿民疫民多賴以全活  
在蜀久人尤思之

兵部右侍郎陳宜傳

宜字公宜江西泰和縣人正統壬戌進士授工科給事中陞應天府丞雲南左布政使進都察院右副都御史巡撫貴州屬四川大壩蠻反偕總兵官率本道兵征討所向克捷陞兵部右侍郎奉勅偏頭關提督防冬聞母喪奔歸道病次濟寧卒年六十訃聞賜祭葬如例宜爲人和厚周密不作意近名然亦未嘗愆事諭者謂宜雖無大建明然亦不失職云



嘉議大夫南京兵部右侍郎王公詔墓表

林俊

弘治辛亥九月六日南京兵部右侍郎趙州王公卒  
事聞上賜葬祭公修倖異人人重遲不戲曹文忠  
公物色異之妻以女治禮經領景泰癸酉京薦甲申  
第進士授工科給事中充蒲藩冊封副使遷都給事  
中累拜湖廣布政司右叅政右布政使貴州左布政  
使進都察院右副都御史巡撫雲南兵部之命語俊  
曰日者推吾良驗吾數且窮行歸故謝疏有明農期  
得請之語用見已意道得微疾方禮上假寐閣中

夢張尚書爲具奠若然曰夢與數符其殆弗與遂付  
所侍孫慶家事付所屬檢囊具棺授以殮法不禱不  
藥不亂志沐浴衣冠俟盡生宣德戊申五月五日享  
年六十有四諱詔字文振別號慎齋曾祖思義祖理  
絳州判官父昂封工科給事中晉寧徙趙始此妣張  
贈孺人墓在郡故城之南原公機直純整無僞行水  
敵如新坐不反作止有常伺之恒不爽一武居喪不  
事浮屠法趨向甚正植已甚廉處族黨甚公以恕藏  
疾匿瑕樂進人善多識書史不專發爲文 慈懿皇  
太后服成適孟秋享 太廟公言新喪從吉非宜乃

引古稱祭暨遺詔母廢祀之文上請裁可六科論事  
過直 憲廟御文華官校手杖臨之甚威衆護膚勝  
落公守不可屈神色自如抗言曰臣愚觸忌諱犬馬  
之誠實惟爲國 上杖之怒解杖竟無害同年于守  
正謫官同寅高文著病死贈賻甚至都憲原公傑經  
略荆襄舉公將事增置行都司鄖陽府縣具通機宜  
璽書褒嘉遇荒先事存恤天旱禱雨時應慮囚多  
平反要囚間可生道俊異其文公問問故曰將使矜  
從戍減公喜揖謝上官奴怙勢博人死托言馬踐公  
主之頗力俊曰馬入屋勢殺豈得踐死弗從公弗憚

久之得罪狀亟謝曰前者執是老夫處不及其虛懷  
類若此孟密諭成悉更前政上官競襲折以禮不涉  
近苞苴諸夷帖息安南爲之寢謀鎮守利入裁損十  
七八巨擘假威福都閫折腰弗禮公寘之法責成桂  
南兩府官從櫬魄斂弗肆左璫爲金寶玩具將進卒  
公疏明主不貴異物宜付所司挾其實範爲金備用  
毋令上供澳故官不能歸妻子多就戎募鬻爲良家  
奴公論諸道資以道里費得歸甚多尚書吳公雲死  
傳久且泯公白其事得證忠節與王文忠並祠昆明  
改額二忠公行實誌弗載公子孫弗及知俊聞知者

嗚呼爭名風熾謫媚競起在敵已然用上下下厥尤  
艱哉休休我公德音不忘式表公基顯示無疆

嘉議大夫南京兵部右侍郎黎公福神道碑

王 鏊

黎故山西望族趙宋時有爲西川制議使者諱某制  
議生樂平尹辰值宋亂不得歸因家縣之薛塘遂爲  
樂平人樂平生元餘姚同知漢鄉餘姚生元哲世稱  
愚浦先生愚浦生偉偉生士雅是爲公之考二世皆  
以公貴累贈通議大夫都察院右副都御史公少以  
進士授監察御史數疏天下利病有人所難言者出  
按真定黜賊吏二十餘輩革宿弊蠹民者數十事有  
戚里豪占民田更數御史莫敢辦公奏一歸之民及

按四川滿洗冤獄十八人得減死有劇盜出沒汝寧重慶間勢頗張督官擒之有白金文綺寶鏤之賜會當道有不快者出知鎮江至則以教化爲首務月朔召見耆老語以敦禮善俗暇則蒞學爲諸生講說義理民以事至郡者教以孝弟詞意肫切聞者感動鎮江當南北衝民困於驛遞供億貪吏又侵漁之公始命視糧收直貯之府以時出納日書而歲考之其弊遂絕初民戶養馬歲課駒駒復課駒轉展無已民破產而馬滋耗公乃差戶爲上中下上牧牝中牧駒下則悉蠲之牝一駒三爲小羣羣有首牝十駒三十爲

大羣羣有長或有物故各以類朋償之馬政舉而民  
力省至今以爲法中貴人汪直威振天下所至有司  
望塵趨拜公聞其將至也則去行屬縣汪銜之及平  
都御史被逮因並逮公詔獄時吳指揮綬在鎮撫曰  
吾聞黎太守好官一無所問已而改知漢陽又改知  
寧國寧國素聞公鎮江之政奸吏豪家望風迎貶初  
巡撫都御史王公克復母患寧國多訟及是入境攝  
一訟者大異之亟草奏薦公擢雲南左叅政未幾進  
廣東右布政使轉左遂召爲都察院右副都御史撫  
治鄖陽三省流民動以萬計號易亂難安公鎮之以



舒龍文武之不職才不當任者易置之總其要而責其成坐以無事徵拜南京兵部右侍郎三月以疾不良于行詔許致仕乘驛以歸弘治某年卒于家春秋六十有七

南京兵部右侍郎呂獻

南京兵部右侍郎呂獻字丕文浙江新昌人成化甲辰進士授刑科給事中弘治初嘗奉使頒登極之詔於安南歷遷禮科都給事中中貴李廣選尚主者受其金陰爲之地獻獨發之時壯其敢言已而擢應天府丞服闋改順天府尋爲府尹轉南京兵部右侍郎以老疾被劾致仕獻馴雅厚重尤精舉業嘗同考會試正德十二年冬卒以子請得如例祭葬

通議大夫南京兵部右侍郎王公俾神道碑

王 鑒

王氏裔出瑯琊晉光祿大夫覽覽孫鎮東司馬導導  
江爲元臣周顯德中明州衙推仁筠始居分水宋遭  
貢進士宗成來家崑山之洲川洲川近分屬太倉故  
今爲太倉州人公諱倬字用檢曾祖琬祖琳考輅俱  
以公貴贈通議大夫南京兵部右侍郎妣皆贈淑人  
公自幼穎敏年二十始從師授周易往往發師旨所  
未發二十五占應天鄉試成化戊戌登進士出知山  
陰縣以憂去改餘干又改蘭谿於山陰興濬補弊革

額外科取之弊政聲赫然爲八縣首餘千有張李二  
姓爭田積三十年不決援據至千人公行視田指一  
大樹曰以此爲界二家俱厭服凡疑獄刃迎縷解未  
朞月囚圉爲空賴盜殺信豐尹公督兵討之賊據山  
爲險播石雨下莫敢進公夜縱白羊千頭於山下鼓  
噪從之賊亂投木石比曉略盡進兵大破之生擒三  
百餘人斬首千級述平其地撫巡交薦蘭谿以積遺  
糧里長繫盈獄公至一訊釋之在赦前者皆與蠲除  
餘爲立限以次輸足旬日獲盜十餘輩夜戶無警素  
舞艾者皆斂跡復以政最奏起弘治乙卯擢南京山

西道監察御史首劾文選貪汙郎中貢欽罷之又劾  
覓尚書不職者五人方面二十七人楊太監者倚寵  
橫甚至箠擊進士又劾罷之時北邊大警詔以平江  
伯陳銳充總兵公言銳素非統御才必債事已而果  
無功旋進貴州兵備副使承米魯福祐亂後荒夷出  
沒爲患公乃修城堡宣朝廷威德漢夷畏愛士官阿  
偉素桀驁不受約束公召之卽至俛首稱服正德丁  
卯以例裁革改廣東瓊州兵備時新脫符南蛇之亂  
生黎爲梗公巡視多所俘獲贖還男女若干人崖州  
千家村尤猖獗公屢聲言討之而師不出忽乘其無

備襲其巢穴大破之明日大戰又敗之斬獲甚衆分  
三大村爲小村以弱其勢奏建守禦千戶所自是黎  
人不復反論者以爲奇功公不以聞進雲南按察使  
又進廣東右布政使會征臨賀砦克之餘賊匿山谷  
衆欲乘勢殲之公不可以禍福諭其長悉來降事聞  
有白金文綺之賜改四川左布政使首革錢穀出內  
積留之弊時盜起蜀中逼成都鎮守議焚附郭民居  
以絕賊公曰是益賊勢也乃勒軍列營以待洞開四  
門賊不敢逼時列郡羣疲於饋運在途多遇虜掠瘠  
疫死者相屬公皆罷之出庫銀糴米貯各倉量遠近

給之民免轉輸軍無缺乏總制彭都御史令具馬三萬緩則以軍法從事州縣猝無所出公命各鄉馬俱入城避賊虜掠不數日馬具足又需熟糧四千石明日日中至公督各市行分運至軍中日猶未午彭公大奇之旋進都察院右副都御史整勅薊州兵備兼巡撫順天等府時屬縣大饑人相食公奏請通州米十萬石賑之以轉輸比至民且爲溝中瘠乃許在邊官軍俸糧預支兩月益以餽直而以官軍所在俸糧散給饑氓軍民兩利焉全活以萬計時虜射死叅將陳乾總兵太監合軍討之屯馬蘭峪公曰虜知吾兵

屯西必且東入乃命指揮葉鳳率兵伏山下虜果毀  
東牆入伏發斬獲六十餘級馬一百五十匹奪回男  
女千餘事聞有勅獎勵有白金文綺之賜御史劾指  
揮十七人臨陣退縮當斬公曰未經督委何謂退縮  
十七人皆得免乙亥進南京兵部右侍郎旋以七十  
懇乞致仕不允得贈祖考皆如公官蔭孫世德爲國  
子生及年七十二上疏乞歸上不得已許之給  
驛以歸仍令有司以禮存問蓋異數云歸三年卒



南京兵部右侍郎陳公琳傳

柯維騏

陳琳字玉疇號石峰莆田城東人舉弘治壬子鄉試  
第二丙辰登進士選翰林庶吉士授監察御史遇事  
侃侃無少忌避業已命巡按陝西且行改命提督南  
畿學政科條品第一以陶育開導爲務不尚威嚴念  
言責爲本職豈可以教事自諉上疏陳端本修政十  
五事咸切治體正德初閣宦劉瑾等亂政願命大臣  
劉健謝遷並去位諫官戴銑諸人以言被逮琳上  
惜老成宥狂直以全 聖德疏謫揭陽縣丞侯丁母  
憂後進爭造門受業室隘不能容乃會講於道院寒

暑不輟時瑾矯旨列劉健等若干人爲朋黨榜

朝堂琳與焉瑾誅除嘉興府同知隨擢知府未幾擢  
山東按察司提學副使其養士一如南畿兩推大理  
少卿國子祭酒皆以忌者用事所沮越四載擢河南  
布政司叅政征科不擾而國用足又四載擢廣東  
左右布政抵任三日會世宗登極錄先朝言事  
滯淹諸臣琳拜都察院右副都御史巡撫江西時逆  
濠始平兵荒交病琳請蠲租賑乏民獲更生改南京  
大理寺卿用法平恕擢南京兵部右侍郎嘗暑吏刑  
二部復攝大理寺以勞瘁致羸卒得年六十有六訃

聞諭祭遣官營葬琳孝友清亮與人交坦夷溫款或  
投以緩急必力爲排解不望其報喜揚人善而諱人  
之短凡薰其德沾其澤者殆如和風甘雨君子謂其  
有裨祖宗忠厚之化焉舊仕之地咸祀於名宦南都  
暨鄉之門生故吏義起建祠以伸追慕扁曰惠德取  
諭祭惠德在人之語爲文醇雅有集若干卷



正議大夫資治尹南京兵部左侍郎贈工部尚

書婺源潘公旦神道碑

嚴嵩

公諱旦字希周世居婺源之桃溪里稱望族從父珍  
官少司馬從兄鑑大司空從子潢大司徒暨公駢武  
夫朝文昌正貳冠珮相映一時仕籍鮮與倫比公賦  
資淵篤績學醇貫初舉進士授戶部主事以能慎著  
名陞郎中督運真州時流賊嘯聚運道多梗公悉心  
督理轉漕無滯擢守漳郡郡故多海寇聚散出沒洪  
洋絕嶼莫可驅除然非土之豪黠陰爲之主彼亦莫  
得肆公至廉知其狀取豪黠數人真之法寇以不來

丁內艱服闋復守邵武時中官鎮守及市舶橫括民  
錢物公裁之不得逞閩俗訟奸株蔓連牽至數歲或  
不解公痛爲懲創變其俗歷陞浙江按察副使江西  
按察使浙江左布政使嚴繩寬布官舉其方法立而  
惠行陞都察院右副都御史撫治鄖陽以平劇寇功  
詔賜金幣改留都理卿復改少宰召入爲少司寇山  
西慶成府宗濬相訐久持未決公奉命往鞫得實以  
聞再勘永和府事人咸稱平改少司馬復兼中丞往  
督兩廣軍務時安南不庭詔用廷議起大司馬毛公  
伯溫率師討之毛方在制公適道其里見公語之曰

安南恃其險阻叛服不常久矣若兵興禍結連歲月  
未可解資餉不繼奈何公宜終喪辭諸朝可得緩師  
俟其聞命求貢因而撫之此萬全策也語不合去至  
廣因得安南不貢狀上疏言夷狄之國本無人倫莫  
登庸之慕黎氏亦季犛之篡陳氏也今若紐師移轍  
以問其罪彼必畏懼修貢俾無失臣禮而止不問其  
能此帝王治夷以不治之法也疏入毛公遂劾公不  
任戎務詔公回佐留都部事公曰吾謀既不用祿可  
荷乎遂拂衣歸然安南之事後卒如公議云公家居  
十餘年不復至城府獨聞人有急周之惟恐後歲旱

徒步率鄉人隣雨爲粥糜以哺餓者久之家日落而  
公陶陶然終其身不以爲憂也以嘉靖己酉卒距生  
成化丙申享年七十有四訃聞 朝廷勅營葬諭祭  
如例特贈工部尚書加等也大父貴廉父傳賢並以  
公貴贈都察院右副都御史母戴氏配程氏贈封皆  
淑人



南京兵部右侍郎劉公棟傳

潘 晟

公諱棟越之山陰人弘治間領鄉薦登正德辛未科進士選庶吉士旋授編修讀書中秘期師古人不染時習所爲文似歐陽脩詩似杜子美文憲費公極相期許丁丑充房考得倫彥式王惟賢馬仲房輩咸海內名士暨世宗御籙公爲講官首進格致誠正修齊治平之說以啓沃聖心歲甲申世宗勅議追崇興獻之禮欲桃武宗主于別廟公抗疏廷諍謂武宗一代之帝主無可桃之禮而又切責時宰引宋時濮議貽笑後世大忤當軸被廷杖死而復甦下

詔獄者月餘。世宗憐公之直，仍赦復原職。詔修武宗實錄，內閣介菴靳公稱公所撰有循史之風。錄成，遷左春坊左中允。是歲乙酉，聞其尊人守愚翁訃，公痛絕伏地者數四。陛辭，抵家居喪，一循古禮。然公以夙性不阿，詿誤政府，出補湖藩參知政事。公至，則剔吏弊，察民隱，斷疑獄，裁冗費，革濫役，平市價，刊布賦役全書，著爲令甲。迄于今，奉行之時，矧顯陵公職提督，不憚寒暑。世宗賜寶鏐綺幣以旌勞勩。巡撫南昌朱公首刻于朝，有翰苑真材，藩垣善政之疏，還河南左轄，開封之宗室繁而多，僕公爲量。

其戶口裁其祿米而給散以時分授有制事事皆服  
其心法因不撓累歲帑中有羨鍰萬計司帑吏于公  
行時私囑公取之公正色抗詈不持一金冰葉之名  
至今膾炙人口癸巳陞南京太僕卿寺署在滁山水  
清勝公于牧政之暇或時吟詠以繼醉翁之跡云甲  
午晉秩太常提督四夷館時欽選譯字生公不但  
門無苞苴而一時權貴所囑稍不爲動公之忠誠無  
論在朝士大夫仰之卽鄉閭小兒亦稱公無間言銓  
司首推當遷少宰而公嫉惡太峻目擊嚴分宜之濁  
亂肥跡不及其門遂爲所憎改留都少司馬朝論大

爲不平而公處之怡然了無愠色司留鑰者數載竟  
爲分宜所忌陰嗾其黨攻之公遂飄然拂衣歸釣于  
鏡湖矣公之家食惟教人以孝悌之義訓子孫以耕  
讀之事避地于興教寺之山麓構芙蓉園鑿方塘蒔  
花木與二三知己結龍山之社足跡不入公府不及  
塵事不候方欲侍杖屨請教益而公乘箕尾去訃聞  
于朝特諭賜祭命官爲營葬域崇祀于鄉公之生  
死可謂哀且榮矣第虞居諸跳丸文獻無徵敢握穎  
直書以紀實行示其嗣令勒之于石俾太史氏采風  
焉

少司馬中川王公教墓誌銘

嘉靖辛丑少司馬中川王公自南都入賀 萬壽還  
道病就醫于鄉冬十一月五日卒于儀封之里第事  
聞 詔守臣諭祭遣官營葬公釋褐卽官禁近薦被  
恩寵前後頒賜白金文綺 御製記頌箴銘詩歌及  
明倫大典大學衍義諸書往往視九列至是卽典優  
渥而遣官尤異數云公諱教字庸之別號中川其先  
良鄉人曾大父士賢有隱德大父斌由鄉舉選授鴻  
臚寺序班終光祿署丞正統己巳避兵河南占籍開  
封之祥符尋徙家儀封父鶴質直好義以公貴贈文

林郎翰林院編修加贈奉直大夫左春坊左諭德兼翰林院侍讀妣孟氏贈孺人加贈宜人公幼穎敏日誦數千言年甫十三補邑庠弟子博極羣書文詞落筆立就嘗過湯陰作賦弔岳武穆王書之祠壁安陽崔文敏公銑見而奇之名由此日起與伯兄天叙稱中州二鳳然數屈于有司正德丙子始領鄉薦時年未四十而人顧以爲晚成嘉靖癸未中會試廷對賜進士第二人及第授翰林院編修公在翰林爲時輩推重自丙戌後同考會試者三所得多知名士冊封周藩諸郡王充副使峽郤偶遺諸王大加敬禮丁亥

充經筵展讀官尋敕內書堂諸內豎望之顚然無敢  
弗率者己丑重修大明會典充纂修官庚寅應詔上  
郊祀議無所徇己復條陳十二事皆切時政辛卯冬  
九載考績遷侍讀壬辰攝司經局癸巳充經筵講官  
公久在講筵雍容凝重進退有儀班行屬目及進講  
至存養省察之方君子小人消長之機反復陳說必  
盡其誠 上爲之注聽甲午遷左春坊左諭德兼侍  
讀掌南京翰林院事丁酉遷國子祭酒申學規以一  
衆志撰箴銘以示向方議薛文清公當文廟從祀以  
昌篤行己亥冊立 皇太子慎簡官僚兼左春坊左

以引金代  
新定

謝德庚子遷南京兵部右侍郎會南京戶部尚書缺  
公攝部事六月議以鹽引羨金代辦漕舟料價蓋衛  
卒餘丁累年重困奏行集議持久不決至公始議疏  
爲令疲瘵用甦公志存經濟而詞林無職事第於章  
疏中時見端緒及講筵國學稍擴所蘊以措諸用雖  
未離文墨議論而功用殆有出於修政立事之外者  
晉貳省部名位彌崇人方企其大行而公溘焉逝矣  
享年蓋六十有三



嘉議大夫南京兵部右侍郎虛齋王公積行狀

王世貞

王公諱積字子崇其先爲揚之儀眞人有諱思保者  
高皇帝時從軍轉徙太倉衛因遂爲太倉人思保  
子貞貞子海海子原俱不仕原子成卽封武選主事  
公也武選公娶於蕭而生公少穎敏天植純篤旣長  
益自刻苦讀書恒達丙夜冬則擁被膝坐夏置兩足  
木盤中避蚊蟲時陸先生安甫者知名士也見公文  
而歎息曰少遲之必爲國器而公旣出試輒不利於  
有司久之始以諸生擢應天薦爲正德己卯明年中

會試時 天子方南狩特次復久之明年爲辛巳賜  
封甲第授兵部武選司主事以 先帝登極恩封公  
父如其官母蕭爲安人而公竟以二親不便養乞南  
得禮部主客司主事至則迎武選公蕭太安人以養  
時時備珍甘奉武選公鍾山大江間武選公故以老  
強起爲歡已而疾日益平公尋遷南京兵部車駕司  
員外郎進武庫司署郎中滿六載實授武庫故所隸  
風馬船千餘艘以備上供物郊廟香幣軍需甲仗者  
分屬諸衛每一船敝轍責衛校士自補破產者相望  
至自雉經溺水以徇長年二萬餘散攝諸郡縣吏因

緣爲隱匿至者僅六千人船日以減耗公旣任武庫  
久執計利弊十餘事上之部爲言於朝始以武庫餘  
羨水衡錢治船不以累衛校士而郡縣所隱匿長年  
悉出爲官用著爲令嘉靖己丑遷廣東布政司左叅  
議治糧儲公念廣儲策未有定乃復考利弊十二事  
一曰時會派二曰通撥運三曰給戶由四曰定本折  
五曰處厥墊六曰設部運七曰定腳價八曰謹收支  
九曰覈屯課十曰議儲蓄十一曰處處糧十二曰處  
寺田上撫按行之廣民繇是稍稍蘇矣而公所部新  
寧新會恩平盜積爲剽劫十餘年不已守令噤不言

兵盜益熾公奮然請得身當之而總督林公富亦才  
公悉以兵事委焉公條議賊有當剿者四有可破者  
六林公報可與公謀以十月發諸道師嶺西師自恩  
平蜺岡入嶺南師自龍眠入舟師自龐學水入合擊  
大破之鹵獲以千計盜遂平撫按議首上公功公遽  
巡避弗敢當捷聞賜文綺一金十兩辛卯入賀萬  
壽還省武選公蕭太安人公念二尊人益以老擬請  
急得扶侍而爲武選公所尼乃留其婦陳安人養居  
無何太安人竟卒公獨身跳而奔喪晝夜哭泣目盡  
廼服且除武選公病痿公手調湯藥旦夕侍左右因

上章乞致仕不報至丙申武選公復卒公哀毀益有  
加喪葬傳禮戍戍服除謁吏部選郡人有當國者意  
公往或私之公謝弗肯往歲餘不調至鬻衣自給乃  
上章乞休吏部愧而除公陝西左叅議公所治平涼  
平涼爲韓國宗屬數百千人咸仰廩縣官不時給則  
聚而囂前治平涼者多轉徙他郡避之公獨不可爲  
委曲計處廩之且徧韓王城約束其宗屬曰若曹慎  
聽王叅微王叅吾安所得食耶公嘗謁召伯祠祠故  
有泉久涸公入拜而泉復陝人異之庚子遷貴州按  
察副使威清威清爲故鬼方地其人用陝公推誠輔

術而行嘗捕得其劇盜張勝俞助等小服則擇取其子弟資異者教之自是科第比比歲與滇粵埒癸卯監其省試甫畢而遷湖廣右叅政時方苗難進賢萬公鏜起家爲都御史討之聞公遷喜顧其屬曰賊不足平矣因促會公謀賊有糯塘山圍者最衝而堅衆議亟攻之公獨謂攻圍固首計第賊方欲以堅老我不若以輕兵綴固而別選精銳從間道破其餘巢餘巢破固膽奪矣兵法所謂攻瑕則堅者瑕是也萬公曰善遂如公言進師而會柄臣有修貴省御史隙者摘試錄中誤株累公謫兩浙轉運副使萬公上疏力

留公不報然竟用平苗功賜金一十五兩公之副轉  
運自藩臬尊官來謂且不憚而公益安之居歲餘遂  
爲本省按察僉事明年爲按察副使又明年爲福建  
右叅政都御史朱公統方議防倭寇下諸道規兵食  
久未報公至勾宿牘稽遺數所以條對甚詳朱公旣  
素賢公至是乃上疏薦公自代且引宋蘇洵氏言必  
代已有賢者而後可以死論鹵斬倭功賜金十兩已  
酉進山東按察使遂爲右布政使尋入閩爲左所至  
有治行庚戌遂進都察院右副都御史巡撫山東是  
時京輔新中虜而山東爲左臂調發罔倍屢恒日公

夙夜謀所以善後者曰飭軍務處糧餉備災荒議保甲革冗員薦逸才疏凡十餘上廷議倚爲重明秋有虜警公勒勁騎環甲駐臨清以俟報會虜退乃已公之爲山東務持大體不爲一切苛煩責小辦治而吏民畏懷之若一壬子天子念公賢特爲遷南京兵部右侍郎以優公而公久勞苦兵事目漸眚乃上疏乞骸骨辭懇甚吏部具公政術而爲言所以欲歸狀乃得致仕公歸杜門不復與時事海內士大夫日冀公復起而公肯益甚竟坐廢公雖以肯廢然歲時行園具酒食聚親族談說鄉里事以爲樂間召所厚故



人雍容杯斚論文義竟日不倦如是者十六年而卒  
公爲人恂恂長者遇大事片言立決卽之溫然襲人  
和而中耿介非其義毫髮不可干其游宦時多從故  
魏恭簡公呂文簡公鄒文莊公游其講究道術甚哲  
然不欲以名於人所別歷八省政績甚偉問之絕不  
肯道居官三十載被服衣素若儒生不爲家而姊弟  
多濡澤者位三品京朝官以齒德尊世而待里人子  
童孺均於敵爲文章典雅有度博識故典驟而遇之  
若空空然於鄉黨寬抑時有排解問之絕不令知所  
自予兄濟美先生意不可一世士願獨善公且嚴重

之日子崇吾所不敢望也嗚呼公眞所謂鄉先生沒而可以祭於社者矣公生以弘治卒以隆慶元年丁卯八月某日春秋七十有六

兵部侍郎謝公存儒傳

謝存儒字懋玠蒲圻人嘉靖丙戌進士性醇樸幼通經術督學蔡潮讀其文奇之及爲行人奉策澧川王卻其貺金遷給事中條陳急務上褒之會論許祭酒失職狀謫判卬州法里中豪不少貸舉學勸農佗郡獄多屬鞫焉歷禮部郎中調共獻后梓官如禮擢南昌府精職事以廉敏爲下僚先籍所部姦邪發則召其長吏按問亡寃郡大治上計還巨雨如注時邵旱久存儒至兩人咸忻悅以方前守嘉魚李承勛云叅政陝西檄諸郡墾田積貯兵餉不置繕甲兵具

卒乘修城堡邊聲大振民不告擾尋陟山東布政以  
年饑穀貴令民兼錢輸漕穀省漕費過半東土以安  
擢副都御史巡撫河南疏折鈞州陶器價鈞人立石  
頌焉釐革祥炬夫費以資軍食提兵守磁州北虜  
不敢南牧黃河決令水工準高下開河上領河始亡  
害晉兵侍郎卒

陸北川穩墓誌銘

徐階

世宗皇帝御極旣踰三十年貪人竊權政成于賄嶺  
海間地僻遠而禁罔疎吏肆民困盜是用生賴上  
神聖選用撫臣計掄力勦迄就平定于時策功諸名  
卿故北川陸公其一也公初爲諸生恂恂孝謹博學  
而工于文以嘉靖甲辰登進士人謂公儒者耳未知  
其能吏也其後爲刑部主事員外郎郎中僚案凡百  
餘人獨公所聽斷獄請老法家讀其詞咸自謂弗及  
辛亥奉命恤刑于閩閩叅將盧鍾副使柯喬繫獄  
當斬時蓋有主之者衆莫敢爲白公侃侃疏曰二臣

忿聞人利倭市以引寇流毒半天下其未請而致刑  
誠爲太遽然謂殺無辜及故勘人而陷之死則非也  
臣以爲二臣罪宜釋朝議屈而從之由是論者稱公  
讀法審持法堅聲譽一日出諸司右然猶未知其能  
兵也踰年坐前疏忤當事人出爲四川建昌兵備副  
使會流賊魁作者招納亡命劫掠金帛子女郡縣莫  
能制公檄上官賢宗仁等分道捕之獲其酋魁作白  
玉上聞賜金幣蜀人爲建生祠論者乃更稱公曰  
是可謂文武才矣後三年公歷江西叅政按察使左  
右布政使而流賊盧梅林起閩楚之交賊張埏起廣

之饒埔璉故縣猾胥也盜官銀覺亡入賊中陰刻石  
曰飛龍傳國之寶投諸池僞與衆漁得以出衆視之  
大驚以爲帝王符也于是大埔賊蕭晚羅枹楊舜相  
與歃血推璉爲長璉自號飛龍人主封枹等皆爲王  
劫興寧長樂園平和使晚屯木窖其黨林贊據南靖  
爲聲援黨呂細斷汀漳官兵所出之途枹舜出永定  
連城絕餉道黨王伯宜入海導倭夷犯潮州率我兵  
不得相救勢猖獗甚辛酉秋八月 詔拜公都察院  
右副都御史提督軍務開府虔州合江西之南贛福  
建之汀漳廣東之雄韶惠潮湖廣之郴州環數千里

皆受節制公行至吉安梗于梅林不得前而時朝  
廷所降兵符猶未至乃以便宜刻關防徵兵討敗之  
獲梅林暨其黨劉肯王橋進至虔召故提督文成王  
公所用黃鄉兵屬以討賊九月擒上杭賊李占春十  
月疏請明職掌增軍餉嚴關隘之禁清兵額出墨吏  
上皆從之兵威益張遂以十一月討田坑賊梁寧  
走之檀嶺襲程鄉峒賊徐東州執以歸十二月分兵  
討連城汰內二峒賊斬曾謝文瓚馬東山蕭大生蔡  
表素焚其巢壬戌春正月麻陽賊袁三犯玉山永豐  
崇安討誅之二月討賊黃積山于大田峒積山中烏



銃死夏五月遂會閩廣兵討璉公曰志有之攻瑕則  
堅可瑕而羣賊瓚爲弱宜先也乃首擊贊贊果降繼  
擊拖舜皆就縛公口兵勢振矣其可後時日夜趣兵  
往擊晚晚駭懼靡措公因使人誘至斬之而潮守何  
鍾亦誘斬伯宣賊益窘乃令總兵俞大猷擊璉璉阻  
險拒守兵不得入公懸重購獲璉殛之盡毀其巢穴  
捷聞賜白金五十兩彩幣四遷兵部右侍郎兼右僉  
都御史仍撫其地秋七月討賊黨之遁誅者李楠吳  
舉曹國清饒表鄧興祖廖選等以爲僇九月合兩廣  
兵討滅程鄉峒賊林朝曦癸亥又會閩兵逐故陷興

化之後夷復其城公前後擒斬賊酋二百餘人賊從  
萬有奇自用兵以來撫臣獲功之多未有過焉者也  
夏五月 上念公久勞于兵改南京兵部右侍郎先  
是公討賊遣其屬某督兵某言此皆平民不足問公  
怒謂曰世有平民而敢稱亂若此者乎汝不力任國  
有法吾將不汝貸然特以激某無意論奏也已而太  
宰胡莊簡公繼公巡撫以他事論某去之某疑出公  
指會其鄉人以御史按江西某因誣公不法若干事  
御史信以劾公公上疏自理其略曰上杭官銀自昔  
以給公費不由臣始且臣以嶺海之民不識禮義而

習爲賊故以此銀時引生徒勞來教誨之期爲國弭  
後患非敢有所乾沒也其所謂祝聖萬壽觀本真人  
許遜故居臣改以爲虔州學非毀爲臣生祠也而某  
故多黨與疏入不奏及公旣罷歸江西巡撫中丞吳  
百朋具上公治行賜白金三十兩綵幣四于是士大  
夫知罷公非 朝廷意而霍司馬冀方司空廉浙撫  
趙中丞孔昭湖撫劉中丞慈相繼薦公不置士大夫  
益信公才遠于人相與慨世未嘗無才才亦未嘗不  
用特尼于羣小用之未及盡也 今皇帝萬曆六年  
予嘗過公見其位卿佐 天子竟其用于南北顧別

再甫期遽卒辛巳五月十七日也距生正德丁丑享年六十五公諱穩字汝成北川其號世爲吳興人

通議大夫南京兵部右侍郎羽泉劉公猷神道

碑銘

王世貞

公諱猷字子京別號羽泉其先以卿士佐周遂爲大  
族代有顯者至宋避戎由汴南徙居建康數傳而元  
提舉順之權茶平江路卽平江之長洲家焉再傳而  
沛教諭德讓德讓生仲輿贈中書舍人贈君生鉉歷  
事五朝以詹事府少詹事終贈禮部左侍郎諡文  
恭有三子其最少者澣澣一子桐仕至湯溪令有治  
聲贈兵部右侍郎兼右僉都御史桐一子黠初贈工  
科右給事中再贈如湯溪公則皆以公貴也娶於陳

贈淑人寔生公繼娶於都封太淑人公生四歲而陳淑人見背都太淑人來稱母十八侍郎公捐館舍公撫其二弟孺妹以共奉太淑人有孝稱蓋久之始字錢淑人以補博士弟子數獲雋諸弟子間可十歲而成鄉薦又六歲始舉進士其明年除知溫之瑞安縣公至則造請士大夫延見長老問所利苦以九等別戶產以九則定徭役民循等應則亡得私下上其孔道爲飛雲江舟子網利不時渡公官置船而籍覈其往來且亭其津以憇渡者邑當助役夫於鄰驛凡三故困苦之人二其直乃已公議毋以夫往而以直往

俾自募邑人大悅俄島寇犯黃巖去邑且遠公獨危  
之趣徙傍地子女貨賄內內城而增其雉堞儲糗備  
募兵壯乘城爲守備居月餘寇果至亡所得逡巡遁  
去乃條防禦八策上之官著爲令瑞安東南於江其  
外大海有鳳皇南吼諸島爲寇巢西北阻江而三港  
遮浦爲括閩道寇所以爭公益募括蒼泰順壯士雜  
邑子弟教之爲陸陳扼其吭沿江鑿外壕繞以周垣  
脩列戰艦海口益署福清蒼山船相牙角調漁舟爲  
偵伺身戎服而旬試之又明年抑賊於飛雲江已又  
殲賊於銅嶺賊其魁寇小定卽葺儒學修經史閣爲

祠祠故陳舍人東褒衣緩帶延諸儒生談說經義其中雍雍如也公爲令先後凡四載積前後計旌薦且數十召拜吏科給事中遷工科右給事中 大朝災議營建而公奉勅司監察條八事上之所以撻剔冗濫姦弊非一又糺一兵馬指揮乾沒者置之理當是時將作大匠幸而中貴人夥大司空雷公以斤斤持之恃公爲益強所裁省萬計論功進通政司叅議仍兼右給事亡何而 上所御西宮災復議營建雅已熟公才侔仍司監察是時嚴相蔣孫鵠以錦衣指揮來預負其寵陽爲推遜公公直據其上坐鵠稍有流



言弗動也亡何鵠改而公以功進太僕寺少卿又進太僕寺卿公感知遇復條馬政八事上之下部覆報可尋遷順天府尹公獨欲修尹故事曰吾得備彈壓安能以獄市諉而晝寢 釐穀下耶所賦役卽彈射豪貴亡所避猾吏不寒而栗時乃議城張家灣而議者曰虜衝也城之利然非十萬金不可公請以五萬金城而移大官三萬金先之益以勸募金公調度往來僅四月而城成會所勸募足還三萬金於大官上悅特賜白金文綺亡何進都察院右副都御史督撫兩浙浙婁中寇前帥雖以傳會取功名然不勝其

汰敗故大司馬趙公用廉節繼兵民稍稍蘇矣公惟趨規是隨而小損益其用特嚴賞罰科身往來海上約束文武大吏罔敢不以情應蓋踰年而廟子湖壇頭懸山東大粵南策黃裙福寧焦洋後先報捷比比南首虜獲生以千計內地晏如論功賜白金文綺尋加正二品奉久之礦賊起直隸之婺源流劫德興玉山遂犯常山勢張甚公疏請會直隸江西兵夾討之不待報而發所部兵由衢州分三道入擣大破之俘斬勁賊七百餘悉散歸農前是公疏上天子嘉公任超爲兵部右侍郎兼右僉都御史總督三省軍務

命下而賊已平矣公復上五事而所稱嚴保甲以清盜源革冒濫以重名器禁妄派以蘇民困於便宜尤切俱報可是時御史龐尚鵬論公功凡千餘言大約謂公用兵能以正合以奇勝卓然有古名將風平居恂恂一儒上深厚不伐豈與炫才邀賞者等哉上

聞而益嘉之錄一子入太學仍賜白金文綺公念民兵召募無已時而衛所士高臥弗與徃行疏乞合爲一軍練之以次減募民兵費詔曰可其下閩廣如令已公滿三歲考封三代押錄一千太學尋遷爲南京兵部侍郎而御史有疑公者謂公自嚴相所驟也

公廷辨略曰監工時坐錦衣鵠上者誰耶御史當不  
聞嚴氏訐而謂自相所驟也臣本末衆所知唯有一  
歸而已前是 上已屈御史疏留公再請不許而公  
勞苦兵間久困末病矣會得代歸病寢劇疏力請骸  
骨賜休沐居里公雖病里居間一朝事未嘗不爲料  
思其後也一君子進未嘗不喜動顏色也然竟病不  
愈而卒中外縉紳大夫未聞問而推轂章上亡慮十  
數矣嗚呼公所謂鞠躬盡瘁死而後已者非耶明興  
賢公大夫之以節著吳者自文恭公鉉始也當景帝  
議易儲羣公悉上署文恭公爲祭酒獨不上署英廟

既復辟而賢之拜祭酒少詹事且倚以相會卒文恭  
公雖不及相然天下高其行而慕說之又蚤貴婁更  
大任子孫鼎起顯盛爲吳甲族公少承之獨以孤生  
居貧其間至憂食指不能具伏臘人或謂公且廢著  
可稍資其羨以謀什一公笑不顧曰不腆先人之廬  
不能守而廢之卽何以有辭地下且吾儒者可什一  
爲蓋未幾而文恭公之里門隆隆然列戟者則公第  
也君子謂文恭公政不外究而公文不內施要之其  
奇節豐績有相發者固不獨稱於劉矣公卒隆慶已  
巳距其生正德己巳春秋六十有一

南少司馬贈御史大夫觀海顧公章志傳

公章志字行之觀海其別號也先世出自吳丞相  
雍其子孫自吳徙滁陽徙崇寧又徙太倉始居太倉  
者諱伯善五傳而至耕雲公珩珩生默菴公鑑卽公  
之祖封徵仕郎刑科給事中公父思軒公濟登進士  
任行人陞刑科給事中卽嘗以公貴贈中憲大夫者  
也母陸氏累封太恭人公止兩兄弟伯名機國子生  
其仲則公公甫三歲而喪父稍長則教于兄年十九  
補州學生逾五年爲嘉靖丙午舉于鄉又七年癸丑  
登進士就選銓曹得行人凡幾年以不附權相分宜

父子量移司副正陞刑部湖廣司郎中請告奉母歸  
歸三歲而分宜敗乃還原任又逾幾年而陞江西饒  
州知府公治饒凡幾年陞湖廣按察使之副治辰沅  
公念母八十矣道遠恐不能任板輿則謀乞養太恭  
人堅不許公于是黽勉就道及九江風濤大作竊自  
歎奉老母涉畏途大非人子所宜乃密具乞疏旣發  
使始以聞得請如志凡三年在膝下比失恃已免喪  
意不樂于出而親黨多從公勸駕者于是強起補廣  
西未幾以齋捧便道歸聞轉貴州叅政又轉廣西按  
察使時爲萬曆丁丑適長君紹芳成進士選中秘疏

稱病不能行從是遂堅臥而不出蓋徜徉泉石者七年會江陵權相敗聖天子側席求舊賢公卿又每推轂公起公于山東仍憲使未期年轉卿光祿于南畿兩月又轉南京兆京兆蓋年餘而陞南少司馬以疾卒于官得年僅六十有四按公少孤而丁門戶之衰役侮狎至賴伯兄身百責之間以寬公于學公以是學早成亦早得舉旣得舉而學又益勵旣舉進士官行人奉使粵所饋遺一不受還居京邸閉戶讀書如儒生爲郎刑部奉三尺惟謹名爲最精法比每獄詞出公手吏不能贊一詞又持法恕多所平反而全



活囚被訊服且感人人稱不寃公時譽望隆起太宗  
伯高安吳公某稱公能文章非但法吏才嘗有意徒  
爲其曹郎又嘗當以已未科會試分考竝格于相嵩  
父子遂皆不果其後安陽郭相君某爲太宰又將改  
用公公不欲請外補而得饒公初治饒水爲災民病  
饑百方處賑賴以活者數萬計雨無麥公以爲憂至  
罷公宴不赴旣而歲大旱以禁屠爲虛文惟齋戒極  
誠露禱澍雨隨降適又匝饒境而止比饒俗健訟吏  
弊最難革獄最難于清公初至則訟牒填委山積羣  
犴充庭吏故窟穴其中以爲奸公于是窮日夜之力

目披覽而心裁決居無何卒就理後來訟者至隨來  
隨剖未嘗一借耳目于左右獄亦未嘗有信宿留不  
法吏斥去一二尤甚者由是此曹兢兢不敢私受人  
一錢前時訟者從下邑來累旬月糧糧已盡未得歸  
至是不累糧而訟以爲常邑民訟不樂于屬邑而願  
屬府他郡民訟不樂屬其郡而願屬饒淮王故稱悍  
公東惟法王重敕其下毋輕犯然公能求王國人疾  
苦宗儀歲祿以時給王國人又未嘗不心感公饒之  
景德鎮主治陶而爲浮梁屬其器用流被天下奸民  
往往有竄匿于陶者易煽構爲亂地與安仁壤相錯

兩縣之民爭而鬩揭竿嘯呼幾乎成大變公行視  
上供器適至焉就與中口占榜文諭以毋輕動輕動  
則良民亦亂民也于是爭者悟解散去爲饒且四年  
不持一錢入私橐比遷去藏中報積俸僅四金餘悉  
推佐公費矣饒人有但飲饒城水之謠當是時人旣  
稱公之廉又咸服公如神明謂公可與顏魯國范文  
正兩公者二而三相與謀建祠尸祝公公嚴令以禁  
乃始已公去後不使公聞竟爲之廣西俗朴而事簡  
公職清軍而清軍御史李公某奉差來廣也李主嚴  
公主寬惟是爲能相濟靖江王故亦悍王也公亦東

惟法革其所自名馳驛者還所藉侵民地于屯地王大慙祭而卒亦無迂言自廣歸後以原官召起東省時當慮囚計大辟者數千人公日夜治爰書手自叅駁賴公生全甚多直指公且得代屬公所當舉刺公又日夜咨訪所評騰咸曲當應天三輔浩穰稱難治公治應天則尤爲能得體民苦凋敝也公則鎮撫之以寬靜兩赤縣徑賦百出難支也公則裁其浮冗不經者錢穀出入吏胥故有所追撓每乾沒其中也公親與民期約悉省除其冗耗會同館驛馬役且乘于豪有力謬稱故事公不顧悉奪而還之大比薦革防

乾種種中肯綮公佐本兵未嘗望決堂事考選軍政  
尚書郭公某倚辦公公議讓時有所自效亦不敢當  
其名留都經戶軍強半于民快船小甲苦于奸豪積  
猾規免而偏累尤苦于管運內使抑勒而誅求累極  
則告塚甲塚甲加以幫甲又加以派及餘丁猶不免  
亡身破家總計各船受害者蓋不止六七萬家矣公  
署部時因旱蠲得應詔言民病乃疏陳快船審甲  
之弊言請如馬船例其篙師改僉充爲雇募稍優其  
直減船額以就之除見支船米二萬石軍自樂輸銀  
萬五千兩外國家誠額外捐銀萬兩米萬石卽可出

此六七萬家于水火之中羣留都磐石之固本部諸  
司惟船務爲最劇軍人疾苦惟船甲爲最深地方隱  
憂亦惟軍窮爲最大溥德意召天和計無有出此者  
疏上 上嘉納亟下所司議行次部上請著爲令具  
如公所言公又念事不處卒成不可以久又謀之尚  
書傳公某上四事重事權明激勸嚴叅罰豫會計大  
要在杜浮言處糧餉而專委始事郎官某某者責以  
有成就疏下所司亦各爲議覆如指留都數十萬人  
莫不舉手加額歸德公比公喪出國門請爲船中者  
祖祭道左哭聲聞于野且肖公像將立祠以報公是

役也事涉中貴人無敢犯者公獨毅然爲不少避忌  
盡疏出而中朝士大夫皆推讓公饒經濟不憚難曰  
少其當大用矣不謂其竟不果也於乎惜哉

南京兵部車駕司郎中述亭劉君學朱墓志銘

王時槐

嗚呼是維吾友述亭劉君之墓蓋予以萬曆壬申謝  
事歸田後十年而君亦致仕歸予疇昔不自揆竊有  
志於聖賢之學顧求友於郡中雖相與討論者未嘗  
乏而真切爲已決志密修必期特立於宇宙間者鮮  
其人焉及君歸居郡城於予爲比隣而君生有至性  
世味泊如脩然在塵埃之外其篤志於學不事言說  
而潛精默會務究極全生全歸之理若饑嗜甘美津  
津焉畢力不少懈也予乃與君訂月會于智度西原



嘗竟日靜對不設發一談第時出所疑密相質証君  
每以所自得微引其端以示予予因君夾持啓迪得  
竭其緜力以粗聞正學之緒餘者皆君之賜也今君  
先我而逝予哀卽未敢自怠亦安所仗以救予失而  
匡策其不逮耶君諱學朱字道明姓劉氏先世諱子  
仁洪武末自安成三舍徙郡北真武山之陰遂爲廬  
陵人傳六世諱英諒贊於郡治前生三子季諱鵬號  
隱菴君之父也母周孺人君兄弟三人長廩生學周  
次學張君其季也始生七齡而孤家產素薄賴兄周  
攜之治博士業而君穎悟過人又醇朴無他俗好一

意誦習攻詞藝有聲已遊邵庠嘉靖戊午遂領鄉薦  
未幾二兄相繼卒君上奉寡母下恤二孤姪曰俊儒  
俊賢競競焉孝慈惟謹屢赴春闈不第乙丑就選爲  
淮安桃源教諭督學御史耿楚侗先生深器重焉隆  
慶丁卯典山西試拔士稱得人陞翰林院孔目尋陞  
都察院司務得贈隱菴公如其官君以奉母宦邸去  
家遠無以伸侍養之懽因告改南得爲南刑部廣東  
司員外郎晉福建司郎中萬曆丙子謝病歸始卜居  
郡城之北姪俊儒補邑庠生弟子俊賢爲郡掾君乃  
喜曰吾二兄有後不墜先人足慰吾母吾可無世戚

矣君已絕意仕進戊寅春周孺人曰汝方強仕之年而吾尚健可遽自廢乎乃勉出補南京兵部車駕司郎中駕司督理船政多積料金君請於大司馬以出納專委主政而郎中特總其數乃竟以執丈軍地爲縣令所搆大司馬印川潘公特爲疏白君遂致仕歸適周孺人喪旣襄事一以治心繕性會友力學爲事杜門掃軌攻苦茹淡不異儒生室如禪舍時時出智度西原聯聚求益必徒步往返於郡邑大夫不以一刺賁謁與宗戚里人煦煦焉淡交而普愛事至惟平心順應無少矜飾雖跡在閭閻而神柄物表人人樂

親卽市童野老莫不信其爲醇靜君子也於書不泛  
覽獨取其切於身心者紬繹而服膺之不厭亦未嘗  
操筆爲文字時有應酬率直吐其衷一根於理而已  
先後直指使欽嚮其高風特表其廬曰理學名儒曰  
清修篤行然君所致力造道之深則或非凡近者所  
可易窺也君之學始由釋門而入久之歸宗於孔  
孟嘗曰性本無二學寧有多岐哉惟學者執見分歧  
自生惑障耳疾革郭君往省手出二絕以示其一曰  
三教原來共一流那堪學子執方修吾今已信還源  
訣不悟無生不可休其一曰無生一竅窮難投多把

生機作盡頭不識神凝機動處開花便是落花秋此  
可以見君之學矣

南京兵部車駕清吏司主事欽縣曹公深墓志

銘

呂 枬

予戊辰同年進士未仕而卒者二人焉順天之姚畏卿定遠之張吉甫初仕而卒者則欽之雄川里人曹君文淵也三人之材行皆卓偉不羣乃皆早逝不大顯于時至今同年論及輒痛惜而於文淵尤甚焉文淵生有奇質方四歲母汪安人歿卽知哀痛如十數歲兒稍長誦習小學諸書日記數千言事繼母周安人尤極孝敬周安人病嘗所以身代之于是父郁憲公南峰先生遣之師事岑山程先生求聖賢之學卽

知居敬窮理用心於內及爲舉子業輒出人意表他  
日應天諸生有忤時貴者督學先生試以畏大人之  
題都憲公亦命君作語有使爲大人者徒知人爵之  
烜赫而不知天爵之尊榮則亦無足畏以後時貴聞  
之屈服弱冠遊郡庠與沙溪汪以正爲莫逆交講學  
白蓮別墅造詣日深時都憲公方知湖廣之寶慶府  
君屢奉之書勸以收愛爲急無怵禍福又曰大人清  
白蔭及子孫後必有食其報者他勿計也正德丁卯  
君舉應天鄉試之魁明年卽登進士時宦官八黨方  
熾而劉瑾尤橫君遂率同年百人抗疏乞 皇上總

攬乾綱以正瑾專權之罪有旨罰跪午門前者五日  
時方酷暑而君素體弱自是益羸瘠矣已巳授南京  
兵部車駕司主事於是南峰先生卽以其往日所寓  
書次第授之曰兒惟不忘乎事我者以自處吾無慮  
矣親友聞之咸稱曹氏父子之賢過人遠矣君蒞任  
卽裁抑進鮮快船及舉行清理屯田數事部尚書甚  
器重之方望其遠到也時汪以正適業大學染疫疾  
鄉人莫肯往視君卽馳至其居躬治湯藥與同起居  
者半月汪病亟泣曰吾僅一女柰何君曰當聘爲吾  
兒棟婦於君後事有深在無慮也卒皆如其言然君



竟亦染疫疾於是年十月一日卒於留都官舍距生成化辛丑年纔二十九歲也自大司馬以下哭臨皆盡哀嗚呼使君不死卽未盈百歲遲三二十年其所建立裨益國家者今當與古之大賢鉅公侶矣乃天奪之速如此諸同年所甚痛惜者此也君諱深文淵其字也高祖關一望於雄川曾祖宗一以隱德重於鄉壽滿一百年配某氏祖以能封南京戶部主事南峰先生諱謀字應麟官至都察院右副都御史在弘治正德間有勲績君配程氏足克內助生子一卽棟縣庠生光大君志其在斯子乎

卷四十三終